



Inuiaqatigiit nukittuut ataatsimoortut

Naalakkersuisut siulittaasuata Kim Kielsenip ukiortaaq 2019-imi oqalugiaataa

(Oqaaserineqartut atuupput)

Asasakka nunaqqatikka – tamassi ukiortaami pilluaritsi!

Ukioq ingerlavissarput nutaaq aallartipparput.

Inuiaqatigiittut suliassagut amerlaqaat.

Immikkulli pingaartillugit taarusuppakka meeqqat ilaqutariillu atugarisaannik suli pitsanngorsaasariaqarnerput.

Meeqqat atugarisaasa pitsanngorsaaviginissaat pisariaqarmat

Taamaattumik Meeqqat Ukiuat 2019-imi ingerlaqqissaaq.

2018-mi pisimasut eqqarsaatigillattaavakka, ukioq sorpassuartigut alloriarfiusoq.

Immikkut eqqaanngitsoorsinnaanngilara suliniut - oqaaserlu - KILLILIISA.

Nunaqqatitta ilaat, Arnajaraq, Arnannguaq, Henrik, Heidi, Michael, kiisalu Gukki Nuka, taakkullusi aqqusaarsimasasi imaannaanngikkaluaqisut – sapiillusi ammasumik tamatsinnut saqqummerpusi.

Ajoraluartumik akunnitsinni artorsaativut pillugit – nipangiussisarnerput nalinginnaavoq.

Ilissi inuppassuit nipaallutik artorsaatisaat oqaasertalersorpassi.

Inuit ataasiakkaarluta artorsaativut unittooqqassutigijunnaarlugit qaangersinnaassagutsigit saqqummiussisinnaaneq sapiissuseqarfiginerusariaqarparput – tamannalu ilissi takutipparsi.

Nukiit maligassiuusut ingerlalerput!

Maligassiuinermut tunngasunik taasaqarama 2018-imi pisimasoq alla eqqaavara.

Ukiaq – illoqarfinni arlalinni – nipaatumik ingerlaaqatigiinnertalimmik akerliussutsimik takutitsisoqarpoq.

Imminut toquttarneq akiorniarlugu iliuuseqartoqarnissaa tassani oqariartuutigineqarpoq.

Innuttaasut iliuuseqaaqataarusunnerat takoqqipparput.

Niviaq Korneliussen – suliniummik aallartitsisoq – minnerunngitsumillu illoqarfinni arlalinni suleqataasorpassuit ingerlaaqatigiinnermilu peqataasorpassuarnut – tamassinnut qujarusuppunga.

Nipaatumik ingerlaaqatigiittoqaraluartoq – oqariutuutisi suli akisuasutut ipput.

Tusaavatsigit.

Aap, nunatsinni suliassaqpugut.

Taamaattumik pisariaqavippoq - nammineq kajumissuseq atorlugu inuiaqatigiinni suleqataanerup innuttaasunit ingerlanneqarnissaa. Suliassat pisortat kisimiillutik naammassisinnaanngisaannik ilaqarmata.

Tulluusimaarutigaara innuttaasut piumassusillit namminerlu kajumissusertik atorlugu suleqataasorpasuit nunaqqatigigatsigit. Timersornerup iluani – kulturikkut – inoqatinik ikiuiniarlutik suliniartut – allallu inuiaqatigiinni sutigulluunniit sunniuteqartumik suliniuteqartut amerlaqaat.

Tamavissi qujaffigaassi!

Nunatsinni ikiortissarsiorluni oqarasuaatikkut saaffigineqarsinnaasut Naalakkersuisut qaammammi uani ataatsimuulersissavaat.

Oqarasuaatikkut saaffiginnittarfissaq nutaaq – “*Tusaannga*” – siunnersorneqarnissamik tusarnaarneqarnissamillu pisariaqartitsisut attavigisinnaalissavaat.

Saaffissaq ataqatigiissagaq – inuttut aporfigut suugaluartulluunniit – pilertornerusumik sukumiinerusumillu ikiortariallit ikorfartorneqarnissaannut aqputtissiuissusaq. Nukiit ataatsimoortillugit!

Immaqa massakkut eqqarsarputit - sooq tamakku aallarniutigigikka?

Pissutaavoq misigisimagama tamakkunani aamma suliassaqpugut.

Suliassagullu naammassissagutsigit – inuit taama ittut pisariaqartikkatsigit.

Nukissallit – sapiissusillit – nunaqqatiminnullu ikorfartuillutik nukissamik siammarterisut.

Inuiaqatigiit ikittunnguuvugut, taamaattumillu akunnitsinni immitsinnut erligisariaqpugut.

Kinaagaluaruttaluunniit tamatta nukissamik tunniussisaratta.

Nunarput ingerlalluarpoq.

Aningaasaqarnerput pitsaasumik ingerlavoq.

Tamanna assigiinngitsutigut takussutissaqarpoq.

Ukiut arlaqanngitsut ingerlanerani suliffissaaleqisutut nalunaarsorsimasut ikilipput.

Nunatsinni isumaginninnikkut ikiorsiisarneq nunarsuatta ilaanni pissutsinut sanilliukkaanni pitsaavoq.

Nunatsinni ilavut peqqutissaqavillutik sulisinnaanngitsut imminiiginnarneqaratik aaqqissuussamik ikiorneqartarput. Tamanna nunatsinni inuiaqatigiittut tulluussimaarutissaraarput.

Kisianni nunatsinni suleqataasut amerlanerusariaqarput.

Taamaattumik suliffeqarluni inuuneq pissaqassutsikkut annerusumik malugineqarsinnaasariaqarpoq.

Nuannaarutigaaralu sulinermut ilanngaatiq atuutinneqalernissaa ukiumi matumani piareersarneqassamat – naatsorsuutigaaarpullu aappaagumiit atuutilersinneqassasoq.

Nunatsinni inuppassuarnik ilaqarpugut ilinniagaqanngikkaluarlutik suliassat qanoq sularineqarnissaannik ilikkarsimanertik atorlugu imminnut napatittunik – ingerlalluurtunillu. Inuppassuit suliarninnik ilikkarsimasut sulilluarnerat nuannaarutigalugu qujamasuutigisassavarput.

Ilinniagaqarnissarli pingaartitassaraarput.

Inuttut atugarissaarnissamat aqutissaamat pingaaruteqarluinnartoq.

Taamaaamat ukiut tamaasa aningaasarpasuit ilinniartitaanermut atortarpagut.

Tamanna ingerlatiinnassavarput.

Uanilu inuusuttut ilissi pingaaruteqarluinnartumik inissisimavusi.

Tullinguuppusi.

Taamaattumik inersimasunngorlusi nammineertussanngorussi suna inuuniutigerusunnerlugu aalajangiussisariaqarpusi – angunissaalu ilungersuullugu

Ikorfartussavatsigit!

Augo Lynge-ugaluaq inuiaqatigiinni qanga eqeersaasimasoq, ilaatigut ima oqariartuuteqarpoq:

“Umiatsiap qeqqaniiginnarunnaarlusi – ilissi iputit aquullu tigusariaqalerumaarpasi.”

Siunissami namminiilernissarsi avaqqunneqarsinnaanngilaq – taamaattumik piareersartariaqarpusi!

Uagut angajoqqaajusugut inuusuttortagut ikorfartornerusariaqarpagut. Eqeersarlugit – kaammattorlugillu.

Tamatta assigiinngitsunik piginnaasaqarpugut.

Matumani pingaarnerpaaq tassaaginnarpoq peqqissuulluni inersimasutut inuuleraanni imminut pilersorsinnaanissaq.

Assassullaqqissut piginnaasaminnik atorluaassapput,

kisitsilerinermut atuagarsornermullu pikkorissut piginnaasaminnik atorluaassapput,

oqaatsinut poqersut piginnaasaminnik atorluaassapput,

nunatta pissarititaanik atorluaanikkut soorlu aalisarnikkut, naatitsinikkut allanilluunniit inuussutissarsiteqarnissamut paasisimasallit piginnaasaminnik atorluaasarnerat pilersueqataaneruvoq pingaarutilik.

Naatsumik oqaatigalugu inuit tamarmik assigiinngitsunik piginnaasaqarfeqarput – tamarmillu atorfissaqartinneqarlutik.

Atorluaallutik inuiaqatigiinni suleqataasut tamarmik inuiaqatigiinnut nam´makkersuu´taanatik akerlianik nukinnik pilersueqataapput.

Taamaattumik paaqqinnittarfinni, atuarfinni ilinniarfiillu nunatsinni innuttaasut piginnaasaqarfiinut naleqqussagaanissaat sulissutigineqassasoq Naalakkersuisut piumasaraat. Ilinniarfiit nunap inuisa pisariaqartitaannut tulluarsakkamik aaqqissugaassapput. Tamattami atorfissaqaratta!

Nunatsinni iliniagaqarnikkut qaffassartuarnissatsinnut atatillugu inuusuttortagut kaammattorumavakka tunuarsimaarnatik aamma nunani allani ilinniarfissat atorluarniaqqullugit,

nunatsinni sutigut tamatigut ineriartornissami inuusuttut tamatigoortut atorfissaqartikkatsigit.

Nunatsinni inuussutissarsiutitigut ineriartortitsinissamut sukarsuit sisamat,

aalisarnek, takornariaqarnek, aatsitassarsiornek nunamilu suliffissat –

aallaavigalugit – pingaartillugillu – suliavut ingerlappagut.

Aalisarnikkut aaqqissuusseqqinneq aallartisaruttorparput – inatsisitigut nutarterinissamut ataatsimiititaliarsuaq ukioq manna sulilissaaq – suliakkiissummillu naammassinnilluni.

Taamaattumik ataatsimiititaliarsuup suliata Inatsisartunit sammineqalernissaa qilanaarnarpoq, siunniusimaneqassaaq suliaq annertoq nunatsinnut innuttaasunullu ullumikkornit iluaqutaanerulerluni naammassineqa ssasoq

Mittarfinnik sanaartornissamut inatsisissaaq Inatsisartut ukiaq akuersissutigaat.

Taakkulu sanaartorneqarnissaat 2018-imi inuit amerlanerit oqaluuseraat.

Maanna silaannakkut angallanneq malunnaatilimmik naleqqussaavigineqartussanngorpoq.

Suliniutillu ukiorpassuarni aalajangiif´figiniar´neqar´simapput.

Aningaasaliissutit amerlaqaat - ingerlariaqqittussanngorpugut.

Tullinnguuppoq sanaartorneqartussat – inuiaqatigiinnit sapinngisamik annerpaamik iluaqutigineqalernissaat.

Angallannikkut aaqqissuusseqqinneq annertoq naammassippat nunatsinni aningaasarsiorneq sutigut tamatigut qaffakkiartussaaq, tamanut iluaqutaasumik.

Tamannalu tunaartarlugu Naalakkeruisooqatigiit ilungersuuteqassammata oqaatigissavara.

Kujataani qanoq aalajangertoqarnissaa utaqqiinnarunnaarlugu taqqavani ineriartortitsinissaq pilersaarusioneqarsinnaalerpoq.

Arajutsisimangilara alloriarnerit taakku kikkut tamarmik isumaqatiginngikkaat. Soorunami allanngorneq taama annertutigisoq tamatta assigiimmik isumaqarfiginaviannngilarput.

Kisianni nunatsinnut naleqquttumik ineriartortitsinissaq pisariaqavippoq. Nunatsinni kinguariit tulluuttut oqilisaannissaat matumani pingaaruteqarmat.

Illoqarfiit anginerit kisimik piorsaavigineqanngillat.

Angallannikkut aaqqissuusseqqinnermi illoqarfiit mikinerit aamma mittarfeeqqanik sanaartorfigineqassapput.

Qaanaami umiatsiliveqarnikkut pitsanngorsaaniarluni suliaq ingerlallualereerpoq.

Uummannami – kiisalu Kangerlussuarmi umiarsualiveqarnikkut pitsanngorsaaniarluni suliniutit taamatuttaaq ingerlapput.

Nunatsinni sumiiffinni tamani naligiinnerusumik ineriartortitsineq ingerlateqqissavarput.

Nunarput ataasiuvoq – sumiiffiit ineriartornikkut ikorfartorneqarnissamik pisariaqartitsinerusut nukinnik atuiffiginerusariaqarpagut.

Nukissaqarluartut kinguaattooriartulersunut oqilisaassinissaat ikorfartuinissaallu pingaaruteqarpoq, soorlu aamma ilaqtariinnermi pissutsit taamaattartut.

Ilaqtariit tassaapput inuttut sorlaqarfivut.

Inuunerput tassaangaanniit tunngavilerneqarlunilu sammivilerneqartarpoq.

Taamaattumik ilaqutariit atugaat eqqummaariffiginerusariaqarpagut.

Nunatsinni ingerlalluartunik nukittuunillu ilaqutariippassuaqarpoq.

Taamaattorli ilaqarpugut ikorfartorneqartariaqartunik –
aqqutissiuunneqartariaqartunillu.

Meeqqat ilaat ullaakkorsiorsimanatik, qasuerluarsimanatik puullaaqqillutillu
atuariartortartut tusartarpagut.

Meeqqat taama atugaqarlutik peroriartortut amerlanerit inuunerminni sutigut tamatigut
kinguaattooriartulertarput.

Inersimasuusugut akisussaasugullu pissutsit taamaattut akuersaarsinnaanngilagut.

Meeraq kinaluunniit ataasiaannarluni meeraasussaavoq, tamannalu
innarlerneqassanngilaq!.

Ilaqutariit inuiaqatigiinnit ikorfartorneqartariaqartut tappiffiginerusariaqalerpagut,
tapersorsornerulerlugillu.

Pilertortumik iliuseqartarnissarput sukataarunnerusariaqalerparput.

Ajornartorsiutit oqimaallivallaartinnagit paasineqartalernissaat –
iliuseqarfigineqartalernissaallu – aallunnerusariaqalerparput,

Ilaqutariinni inooriaatsit atugarliortitsisuusartut kinguaariinnut tullernut
ingerlateqqinneqartarnerisa unitsinneqarnissaa inuiaqatigiittut ataatsimoorullugu
sulissutigisariaqarparput.

Tamatuma sulissutiginerani innuttaasut namminneerlutik suleqataanissaat
pingaaruteqarluinnarpoq.

Ukiumi matumani ilaqutariinnermut atatillugu politikkimik nutaamik Naalakkersuisut
saqqummiussaqaassapput, tasanilu pingaartinneqassaaq pisortat tungaanniit
iliuseqartoqassatillugu ilaqutariit ataatsimut isiginiarneqartarnissaat –
ataatsimoorullugillu suliniuteqarfigineqartarnissaat.

Angusassatta pitsaanerpaartaat angussagalarparput siunissami meeqqanik
angerlarsimaffiup avataanut inissiisariaqartarneq
pisariaqarun´naarsissin´naagaluarutsigu.

Meeqqanik angerlarsimaffiup avataanut inissiisarneq sapinngisamik
minnerpaaffissaanut pitinnissaa siunertaralugu suleriaasivut aqqqissuuttariaqarpavut.

Angajoqqaat meeqqamminnit sumiginnaasut ikilisinniarlugit nuna tamakkerlugu
iliuusissatut pilersaarummik Naalakkersuisut ukiumi matumani suliaqartussanngorput.

Meeqqat ikiorniarlugit inunnik isumaginnittoqarfinni, ulloq unnuarlu angerlarsimaffinni allanilu inulerinermik suliaqartorpassuususi tamassi ima oqarfigerusuppassi.

Meeqqat – innuttaaqatigullu inersimasut - ilaatigut imaannaangitsorujussuarmik atugaqartut inuiaqatigiit tamatta sinnerluta qasujaallusi sullippasi.

Pisortani sulisuugussi – imaluunniit peqatigiiffilerineq aqutigalugu inoqatitsinnik ikorfartortariaqartunik sullissisuugussi –

tamassi inoqatitta pisariaqartitsisut saaffissaqarnerannik qulakkeerinnittuuvusi –
ilissi tassaavusi inoqatitsinnut ikiortariaqartunut nukissanik immersuisut.

Tamassi sulinersi nersunartuuvoq, tamatta nalunngilarput suliasi oqimaatsuusoq, taamaattorli qasusuillusi suliuarpusi.

Tamassinnut qujanaq.

Nunatsinni utoqqartagut ilaqutariinni pingaarutilerujussuupput.

Utoqqartatatta pitsaasumik atugaqarnissaat aqutissiuutissavarput.

Utoqqaat suli pisinnaasut tunngaviusunik utoqqalinersianik annaasaqanngikkaluarlutik saniatigut isertitaqarsinnaalernissaat sulissutigineqassaaq.

Taamaalilluta utoqqalisut pisinnaasut sulerusuttullu suliffimmiiginnarnissaat angusavarput.

Utoqqaat sulerusussusillit eqqaagaangakkit eqqaanngitsoorneq ajorpara Anthon Geisler,

99-inik ukioqarluni Ilulissani nammineq pisiniarfiutiminik suli ingerlatsisoq.

Akunnitsinni taama maligassiusisoqarnera nukittuallannartuullunilu tulluussimaarnarpoq.

Utoqqalereeraluarlutik sulerusussuseqartut – utoqqalinissaminnullu piareersarsimasut - atugarisaasa pitsanngorsaaviginissaat angussavarput.

Tamanna pillugu inatsisissatut siunnersuut ukiumi matumani Naalakkersuisut saqqummiutissamaarpaat.

Innarluutillit atugarisaat pitsanngorsaaviginiarlugit innarluutillit najugaqarfiisa ullutsinnut naleqqussaavigineqarnissaat pimoorunneqarnerulissaaq.

Aamma innarluutillit annertunerusumik tapersorsorneqartalernissaat siunertaralugu inatsisissatut siunnersuummik Naalakkersuisut ukiumi matumani saqqummiussinissartik siunnerfigalugu sulinertik ingerlappaat.

Innuttaasut peqqissut tassaapput nunatsinni sutigut tamatigut sapinngisamik
ajunnginnerpaamik atugaqarnissatsinnut toqqammavissagut.

Taamaattumik innuttaasut peqqinnerulernissaat anguniarlugu suliassaqarfiit
assigiinngitsut akunnerminni suliarninnik ataqatigiissaarinerulernissaat
Naalakkersuisuniit siunnerfigaarput.

Ataqatigiinnerusumik suleriaaseqartoqalernissaa qulakkeerniarlugu Naalakkersuisut
siulittaasuattut aalajangerpara isumaginninnermut naalakkersuisoqarfik,

aamma peqqinnissamut naalakkersuisoqarfik - allaffissornikkut
ataatsimuulersinngikkaluarlugit,

Naalakkersuisup ataatsip akisussaaffigilissagai.

Innuttaasut inuuniarnikkut nalingiinngitsumik atugaqarnerat immi innuttaasut
peqqissusaannut akornutinngortarpoq

Inuiaqatigiit timikkut tarnikkullu peqqissuunerat qaffassassagutsigu

suleriaatsinik ataqatigiissaarinerulernissaq pisariaqarpoq.

Namminersorlutik Oqartussani suliassaqarfiit assigiinngitsut sulinerminni suliarninnik
ataqatigiissaarisarnerat annertusarneqassaaq.

Saniatigulli kommunit,

inuussutissarsiornermik ingerlataqartut - kiisalu kattuffiit - suleqatigalugit

inunnik isumaginninnermut attuumassutillit

peqqinnissallu tungaatigut suliassaqarfiit

pitsaanerusumik naammassisaqarfiusalerlarnissaat

aqutissiuutissavagut.

Tamatta nuannaarutigeqisatsinnik Amerikkap Nunavittaaneersut
pissartanngorniunnerat nunatsinni aasaq aqqissuunneqarpoq.

Kalaallit Nunaata Chile-llu pissanganarluinnartumik unamminerini piffissap
sivitsorneqareernerani nunatsinneersut naggaterpiaani ajorsarput.

Tamatsinnut uggornartorujussuuvoq – kisiannili unamminerit takutippaatigut qanoq
ataatsimuullaqqitsiginersugut.

Aqqissuussineq iluatsilluarpoq – tamattalu nunanut allanut unammisartuutigut
tulluussimaarutigeqaagut.

Pingaaruteqarpoq meerartatta nammineq nunatsinneersunik nuannaartorisagarnissaat – tamannalu timersornikkut annertusaaviginiartigu.

Timigissarneq timersornerlu inunntut ataasiakkaanut pitsaasuvoq.

Innuttaasut peqqinnerulernerat

inuunerissaarnerulernerannik – peqqissuullutillu inuuneqqortunerulernerannik malitseqarumaarpoq.

Taamaattumik 2019-imi aningaasanut inatsisissaq aqqutigalugu

timersornikkut ingerlatat aamma pitsaaliuilluni suliniutinut

aningaasaliissutaasartut ukiuni tulliuttuni amerlineqartussanngorput.

Nunatsinni pinngortitaq avatangiisillu tassaapput maani nunami erlinnaartutitta pingaarnerit ilaat.

Pinngortitaq, uumasut avatangiiserpullu taakkuupput nunami maani ukiorpassuarni najugaqartuarsimanitsinni isumalluutiginerpaasarisimasagut.

Nunatsinni pinngortitarsuup kusanassusersua - immikkuullarissutaalu - nunaqartuusugut tulluussimaarutigingitsoorneq ajorpagut – taakkuuppullu aamma nunani allaniikkaangatta angerlarsernitsinnut pissutaanerpaasartut.

Tamannalu peqqutigalugu avatangiisinut aningaasaateqarfik pilersinneqartussanngorpoq – pinngortitaq eriagaissagatsigu

Nunatsinni eqqaaveqarnikkut ataqatigiissaakkamik aqqjissuussineq kommunit tamarmik Namminersorlutik Oqartussallu suleqatigiillutik pitsanngorsaavigisussanngorpaat.

Kommunit Naalakkersuisullu taama isumaqatigiissuteqarnerat takussutissaavoq oqartussat suleqatigiikkaangata anguniagassat annertugaluartulluunniit inornannginnerulersartut.

Angusaq imaannanngitsuvoq – nuannaarutissaq

Nunatsinni pinngortitarsuup tunniussinnaasaannik atuisuuvugut.

Aalisarneq piniarnerlu inuunitsinnut ilaavoq.

Ilatta tamakkiisumik inuuniutigaat – ilattalu peroriartornerminni tapertaralugu pissarsiniartarnertik ilitseqqussaraat.

Aalisarnermi piniarnermilu atueriaatsit aqunneqarnerani uumasorsiuut/biologit kiisalu aalisartut piniartullu ilisimasaat tamarmik pingaaruteqarput.

Attumi pinngortitami isumalluutit pillugit siunnersuisut, Nunat avannarliit 2018-imi Avatangiisinut nersornaataannik nersornaaserneqarput.

Taakku suliaat piniartut aalisartullu ilisimasaannik oqariartuutigisartagaannillu takussutissartalersuineramik imaqarpoq.

Taamaattumik Attumeersut angusaat – nersornaaserneqarnerallu pillugit – pilluaqqorusuppakka, qujanarlu maligassiuillusi periaatsimik ineriartortitsisimagassi.

Ikinnerussuteqarluni naalakkersuisoqarnek nunatsinni atugaasorsuunngilaq. Ullumikkut Naalakkersuisut ikinnerussuteqarlutik ingerlatsipput, oqarsinnaavungalu taamatut suleqatigiinneq aallartilluarmat – ingerlalluarlunilu.

Aamma suliassanut anguniakkanullu aalajangersimasunut partiinik allanik suleqatarneqartarnerput ajunngitsumik ingerlavoq.

Taamaattumik Naalakkersuisuni – Iniatsisartunilu – suleqatigiinnerit ingerlalluarnissaannut isumalluarpunga.

Naalakkersuisut inuiaqatigiillu sinnerlugit Ataqqinartorsuaq Dronningi taassumalu Ilaqutai Kunngikkormiut ukiortaami pilluaqquakka. Aamma danskit Folketingiat naalakkersuisuilu, savalimmiormiut Lagtingiat naalakkersuisuilu, kiisalu inuiaat danskit savalimmiormiullu tamaasa pilluaqquakka.

Minnerunngitsumillu inuiaqatigut ilinniagaqarlutik, napparsimallutik – imarsiorlutik – allatigullu suliffimminnut atatillugu angerlarsimaffitik qimallugit nalliuttorsioritariaqarsimasut tamassi eqqaamallusi ukiortaami pilluaritsi.

Siorna oqalugiaatinni oqaatigeriigara imarisaa pingaartikkakku oqaatigeqqissavara:

Asasakka nunaqqatikka...

Allanngortinneqarsinnaanngitsumik kinguaariinni angajoqqaavut ukiorpassuarni siuttorisimasavut utoqqalillutik qaangiussulerput. Uagullu inuiaqatigiinni siuttuulersutut tamanut toqqissisimanartumik asannittumillu ingerlatsissalluta pisussaavugut. Kinguaatsinnut maligassiuilluta. Soorlu utoqqartavut uagutsinnut taamatut oqaassisarsimasut.

Siunissaq nammineerluni takkuttarpoq, ineriartornerli aatsaat sulinikkut malunniuttarluni.

Taamaammat ilungersussaagut nunatta siuariartornissaa ineriartornissaalu pillugit.

Augo Lyngep taalliaani –“Suna inuusuttuusup anguniassavaa”, tassani versit pingajuat inuiaqatigiittut killiffitsinnut siunnerfigisatsinnullu tulluartikkakku issualaassavara:

“Taamaattoq takuarput

Suli inortugut

Miserratiginngilarput

Aatsaat pilersugut

Taamaattoq upperaarput

Kalaallit allatut angusaqarsinnaasut

Siumukartutut.”

Taama oqarlunga Nunatsinni innuttaasut tamassi ajunnginnerpaanik kissaallusi ukiortaami pilluaquassi.

Guutip nunarput inuilu sernigiligit